

淡然齋集

<望天>

我本天涯逐夢人，不隨花落到凡塵
平生所貴爲何物？赤子之心一片真

<戲題和樂>

萬感江湖舊管絃，驟彈三味舞飛仙
浪人淒絕丹心裂，散作櫻華動遠天

<偕母漫步中央大學玄武湖畔>

漫笑平生遊興淺，湖光亦足慰凋零
泱泱雨洗乾坤大，漠漠風吹草色青
俗世升沉原是夢，身心脫落自無形
長吟逸句怡天性，勿學庸儒守一經

<遊水社鄉日月潭青龍山玄光寺>

了知實相無人我，打破禪關見杳茫
名寺梵音超十界，聖僧靈骨放玄光
紅塵夢繞菩提路，淨土蓮開自性鄉
空與不空皆是妄，三千一念禮心王

<讀李長吉詩因作>

詩鬼行歌秋夢裡，倒騎羸馬踏繽紛
傷心萬古花間月，落魄千年死後文
誰教浮生多梗概，自憐華羽絕塵氛
秦娥舞罷飛光老，漢劍追風入紫雲

<意興>

清風一拂絃，醉向百花前
何處堪尋夢，長歌殘月天

<山景>

起視千山晚，流俗一笑中
天涯迴夢處，迴立向長風

<小疾>

側身天地窄，萬事病中疏

多謝雲相訪，秋風八月初

<微塵偈>

佛觀天地幻，群動等微塵
寂照無邊際，心魔鍊我真

<讀曹唐游仙詩>

仙道渺難求，長生似蜃樓
壺天清夢冷，滄海玉顏秋

<浩嘆>

八月海風秋，天高任我遊
心隨長浪遠，意逐白雲悠
鷗鷺當明月，魚龍潛暗流
男兒存磊落，毀譽復何憂

<即事>

暑氣未全收，人間已入秋
殘香誰致意，清景蝶尋幽
悶極思輕舉，飄然作遠遊
我心常浩蕩，豈爲利名憂

<中大中文所開學漫步於松林道上>

千風吹夢破，一笑倚天高
流水人情異，群山氣象豪
澄明通大道，蕭散步松濤
悟得南華趣，解牛焉用刀

<讀李青蓮詩因作>

名利難拘我，煙嵐能醉人
息心逃大偽，舉目見清真
浩浩風雲色，嶙嶙車馬塵
長歌辭濁世，飛去玉壺春

<清晨觀新聞將李、曾、房等富少惡行對照並舉有感>

殺警紅塵裡，呼麻夜店中
撿屍何快意，飲酒更迷濛
靠爸開超跑，摺人充狗熊

嗟哉男子漢，竟作寄生蟲